

Tinjauan IPS: Rakyat S'pura mahu lebih satu parti politik, tidak sokong pemimpin autoritarian

Irma Kamarudin

Berita Harian, 27 September 2024

Sebahagian besar rakyat Singapura lebih memilih untuk mempunyai lebih satu parti politik yang bertanding dalam pilihan raya dan memegang jawatan politik, menurut dapatan satu tinjauan yang dikeluarkan Institut Pengajian Dasar (IPS) pada 27 September.

Tinjauan itu juga mendapati majoriti rakyat Singapura tidak setuju dengan idea untuk menghapuskan pilihan raya dan parlimen, serta mempunyai seorang pemimpin yang menentukan semua perkara.

Tinjauan Barometer Asia (ABS) 2023 edisi Singapura itu menunjukkan 38.5 peratus responden menyatakan mereka sangat tidak setuju, manakala 34.4 peratus pula tidak setuju bahawa hanya satu parti politik harus dibenarkan bertanding dalam pilihan raya dan memegang jawatan politik.

Sementara itu, 36.2 peratus responden menyatakan mereka sangat tidak setuju dan 36.5 peratus tidak setuju dengan idea bagi negara ini menghapuskan pilihan raya dan parlimen, serta mempunyai seorang pemimpin 'kuat' yang menentukan semua perkara.

IPS dalam kenyataannya berkata ini menunjukkan "rakyat Singapura menunjukkan sikap kuat yang tidak menyokong senario kawalan autoritarian".

ABS merupakan tinjauan perbandingan pandangan umum mengenai sikap politik di Asia Pasifik yang mengkaji tahap norma demokrasi dan sistem politik di 15 negara dan masyarakat dalam rantau ini, termasuk Jepun, Korea Selatan, Malaysia, Thailand dan Vietnam.

IPS telah menjalankan dan membiayai setiap tinjauan di Singapura sejak 2010. Tinjauan itu melibatkan sekitar 1,000 rakyat Singapura berusia 21 tahun dan ke atas setiap kali ia diadakan.